

## AUTORSKE NOVINE

decembar/prosinac 2015.

### SADRŽAJ:

- Održana godišnja Skupština AMUS-a
- Kadrovske promjene na čelu Stručne službe
- Održan sastanak sa predstavnicima autora u Banjoj Luci
- Sarajevska tržna inspekcija intenzivirala rad na provođenju Zakona

### Održana godišnja Skupština AMUS-a

U Velikoj sali Međunarodnog centra za mlade na Grbavici, 03.12.2015. je održana godišnja Skupština Asocijacije kompozitora – muzičkih stvaralaca. Velika imena BH



muzičkog stvaralaštva - Dino Dervišhalidović, Goran Bregović, Ranko Boban, Hari Varešanović, Sead Zele Lipovača i drugi su sa ostalim kolegama raspravljali o brojnim, važnim pitanjima po autore – usvajanju internih akata Udruženja, položaju autora u društvu, zaštiti autorskih prava i problemima sa kojima se Udruženje susreće.

Najzanimljiviji dio sjednice je svakako bila rasprava o unutrašnjoj organizaciji koja je na prošlogodišnjoj sjednici bila izuzetno burna. No, suprotno od nekih predviđanja, ove godine su autori pokazali zrelost kroz međusobno uvažavanje i argumentovanu diskusiju kojoj je zasigurno doprinjelo i prisustvo predstavnika Instituta za intelektualno vlasništvo BiH na sjednici. Nadzorom Instituta nad radom AMUS-a i nalaganjem mjera za ispravljanje nepravilnosti u radu koje su uočene te aktivnostima rukovodstva u sprovođenju tih mjera, autori su dobili važnog partnera u procesu kontrole i poboljšanja načina poslovanja u budućnosti.



Pored usvajanja najvažnijih dokumenata - novog Statuta Udruženja, Godišnjeg izvještaja i Plana za sljedeću godinu, Skupština 2015. je pokazala da BH autori imaju snage da se suoče sa problemima i zadacima koji su pred njima te da zajedno, na demokratski i transparentan način, rade na njihovom rješavanju.



## Kadrovske promjene na čelu Stručne službe AMUS-a

Dugogodišnji Generalni direktor Stručne službe AMUS-a, g. Mirza Hajrić je na sjednici Upravnog odbora održanoj 15.12.2015. članovima UO dostavio svoju neopozivu pismenu ostavku. Na istoj sjednici, da bi Stručna služba AMUS-a mogla nastaviti nesmetano funkcionisati, njegova ostavka je prihvaćena, a na mjesto vršioca dužnosti Generalnog direktora Stručne službe imenovana je Lejla Trnčić, magistrica ekonomije i dosadašnja zamjenica direktora za finansije. Rukovodstvo AMUS-a se gospodinu Hajriću zahvaljuje na njegovom radu, zalaganju i ostvarenim rezultatima u proteklom periodu sa iskrenim željama za uspjeh na privatnom i poslovnom planu u budućnosti.



## Održan sastanak sa predstavnicima autora u Banjoj Luci

U nedjelju, 27.12.2015. Sekretar AMUS-a, Samir Mujagić je održao sastanak sa predstavnicima autora, članovima AMUS-a iz Banje Luke. Na sastanku se govorilo o brojnim, važnim temama za autore i planovima AMUS-a za predstojeću godinu sa naglaskom na aktivnosti u banjalučkoj regiji. Najavljeno je skoro otvaranje kancelarije AMUS-a u ovom gradu što su autori pozdravili te naglasili da je to jedan od važnih koraka ka jačanju AMUS-a na tom području.



Sastanku su prisustvovali: Anica Zrilić, kompozitor i tekstopisac; prof. Mladen Matović, kompozitor i dirigent; Petar Topalović, frontment grupe "Sopot"; prof. Saša Pavlović, kompozitor i umjetnički rukovodilac etno grupe "Iva"; Lukijan Ivanović, kantautor; Dejan Zorić - bend "Ajfel"; Boris Glišić, kompozitor, aranžer i muzički producent i Dragoljub Sladojević (Muzička produkcija RTRS)

Dogovoreno je da se, u skladu sa usvojenim Planom Udruženja za 2016. godinu, ovakvi sastanci održavaju periodično jer predstavljaju najbolji način povezivanja autora kroz direktnu komunikaciju što će zasigurno doprinjeti povećanju broja članova u ovoj regiji te realizaciji novih ideja i projekata na terenu.

## **Sarajevska tržna inspekcija intenzivirala rad na provođenju Zakona o kolektivnom ostvarivanju autorskog i srodnih prava BiH**

Nakon nekoliko dopisa i sastanaka predsjednika Skupštine AMUS-a Dine Dervišhalidovića sa premijerom Kantona Sarajevo, Dinom Konakovićem i predsjednikom Skupštine Kantona, Seadom Bukvom, konačno je riješeno pitanje djelovanja tržnih inspektora u skladu sa Zakonom o kolektivnom ostvarivanju autorskog i srodnih prava BiH. Naime, novi Zakon o inspekcijama u FBiH je omogućio da se nadležnost sa federalne Inspekcije spusti na kantonalni nivo, te je tako i učinjeno uredbom, odnosno zahtjevom direktora kantonalne Uprave za inspeksijske poslove. Tako je svaki tržni inspektor u Kantonu Sarajevo dobio rješenje federalne Inspekcije da je ovlašten za provedbu navedenog i nekih drugih zakona. Posljedica ovih aktivnosti koje je rukovodstvo AMUS-a vodilo protekle dvije godine je konačno urodilo plodom. U Stručnu službu AMUS-a svakodnevno dolaze ugostitelji koji su u proteklom periodu odbijali regulisati korištenje muzike ugovorom sa AMUS-om i potpisuju ugovore, jer ih je u redovnoj kontroli Tržna inspekcija na to upozorila.

